

«Exercitar ed anc ina giada exercitar»

Brigada d'infanteria da muntogna 12

DA GION NUTEGN STGIER / ANR

■ Il cumandant Franz Nager ha fatg ina bilantscha positiva da l'exercizi «Marmotta». A chaschun da l'ensolver per las medias ha el ditg ch'il stab da la brigada haja fatg l'ultim onn in grond progress. Er il 2014 fan battagliuns da la brigada danovamain servetsch en noss chantun. Ina giada ad onn envida il cumandant da la Brigada d'infanteria da muntogna 12 ils represchentants da las medias ad in ensolver. Quel ha gè lieu ier a Cuira nua che brigadier Franz Nager, il cumandant, è stà ospitant e referent. L'exercizi «Marmotta», che ha gè lieu avant duas emnas en il Grischun central cun passa 2000 schuldads, saja reussì bain cun intginas excepziuns. Fritgavla saja cunzunt stada la collavuraziun cun la polizia chantunala, ha menziunà Franz Nager. Stab e schuldada hajan lavurà bain, cunzunt il segund e terz di da l'exercizi. Persvadì hajan uffiziers e schuldads en spezial quai che pertutga tactica ed engaschi. Sa cumprovà saja er il biro movibel, ina sort tenda, nua ch'il battagliun 70 aveva ses biro quels trais dis da l'exercizi. Per la brigada saja quel experiment cun il biro movibel stà in novum. En general saja el stà cuntent cun l'exercizi «Marmotta», er sche uffiziers e schuldads meritan «be» il giudicat suffizient fin bun, ha accentuà Franz Nager. Be far compliments saja betg adina la via da success, ha ditg il cumandant da la Brigada d'infanteria da muntogna 12.

La schuldada è pli u main fita

Cuntent è Franz Nager er cun la qualitat da schuldada ed uffiziers. «Savens èsi uschia che la qualitat da la truppa sa lascha cumparegliar cun las personas che stattan al timun da quella», manegia Franz Nager. La schuldada saja pli u main er fita, quai haja er confermà il marsch da 15 km ch'el haja introducì a l'entschatta da quest onn per tuts ils ra-



Il substitut dal cumandant, il cumandant ed il schef da comunicaziun da la Brigada d'infanteria da muntogna 12: colonel Lorenzo Rampa, brigadier Franz Nager e chapitani Kaspar Bosshard (da san.).

FOTO G. N. STGIER

dund 7000 umens da la Brigada d'infanteria da muntogna 12. L'onni proxim vul Franz Nager schizunt introducir per la schuldada da sia brigada in marsch da 20 km. In marsch pli lung saja betg mo bun per la sanadà da la schuldada, mabain saja quel er ina buna chaussa per la collegialità da la truppa. El saja ventiraivel e losch dad esser cumandant da la Brigada d'infanteria da muntogna 12, ina truppa seriusa e fidada, ha ditg il brigadier. Dad esser al timun da quella brigada saja ina vaira onur. El ha er ditg che ses stab saja sa sviluppà fitg ils davos dus onns, quai er grazia a la scolaziun ed instrucziun supplementara. Fatg haja il stab cunzunt in progress quai che pertu-

tga la fasa da planisaziun dad in exercizi, quai che saja dentant er il cas tar la fasa da realisaziun dad in exercizi. Franz Nager ha ditg ch'el vegnia er en il futur a realisar mintg'onni dus exercizis per ses stab. Exercitar ed anc ina giada exercitar, quella devisa vala betg mo per la schuldada, mabain er per ils uffiziers ed il stab da la Brigada d'infanteria da muntogna 12.

Anc naginas infurmaziuns pli concretas

Er il 2014 fan intgins battagliuns e singulas cumpagnias da la Brigada d'infanteria da muntogna 12 lur servetsch en il Grischun. Quai cunzunt a Cuira,

en il Signuradi, en il Grischun central ed en il Partenz. Ultra da quai fan truppas da la brigada er servetsch en la Svizra centrala ed en il Giura. Il mez da mars è ina cumpagnia dal battagliun 85 en funcziun tar il final da la cuppa da skis a Lai. Quai che pertutga l'avgnir da la piazza d'armas Cuira sappia el betg dir bler, ha ditg Franz Nager. «Fin uss avain nus naginas infurmaziuns pli concretas e nus tuts sperain a la fin da november sin buns segns da Berna», manegia Franz Nager. A la fin da quest mais vegnian cusseglier federal Ueli Maurer ed il schef da l'amarda André Blattmann ad infumrar co vinvant cun las plazzas d'armas.